



**JUDICIAL SYSTEM MONITORING PROGRAMME  
PROGRAMA DE MONITORIZAÇÃO DO SISTEMA JUDICIAL**

***Komunikadu Imprensa***

Períodu : Feveiru 2012  
Edisaun : 23 Feveiru 2012

**Parlamentu Nasionál Hahu Plenaria Diskusaun Espesialidade ba Projeitu Lei  
Reparasaun no Institutu Memória Públiku**

Iha loron 21 Feveiru 2012 Judicial System Monitoring Program (JSMP), atravez husi Sub. Unidade Programa Observasaun Parlamentu (POP) hala'ó monitorizasaun iha Parlamentu Nasionál konabá diskusaun Espesialidade ba Projeitu de Lei Nú. 19/II “*Quadro do Programa Nasionál de Reparasaun no Projeitu Lei Nú. 20/II konabá Cria o Instituto da Memoria*”.

Diskusaun ba projeitu lei rua ne'e dirije husi Vice Prezidente Parlamentu Nasionál Sr. Vicente Guterres. Durante diskusaun JSMP nota katak, maioria membru parlamentu sira konkorda atu aprova lei rua refere antes remata sira nia mandatu.

Iha sesaun abertura diskusaun ba lei rua ne'e, Vice Prezidente Parlamentu Nasionál informa katak, diskusaun ne'e hala'ó bázeia ba despaixu husi Prezidente Parlamentu Nasionál Sr. Fernando “La Sama” de Araújo. Iha despaixu Prezidente Parlamentu Nasionál nian haktuir katak *‘lei rua ne'e relevante duni atu diskute tanbá inisia iha segundu legislatura, tanbá ne'e tenki aprova lei rua ne'e antes mandatu remata’*.

Mesmu nune'é, infelizmente, diskusaun ne'e hala'ó deit iha sesaun dader, no falla atu kontinua iha sesaun lorokraik tanbá quorum la prenxiu no meja Parlamentu Nasionál deside dala ida tan atu reagenda to'o segunda semana oin.

Diretór ezekutivu JSMP Luis de Oliveira Sampaio haktuir katak mesmu *rekoñese katak, deputadu sira okupadu ho agenda política barak maibé JSMP kontinua enkoraza deputadu sira atu la kontinua ignora importansia husi projeitu lei rua ne'e*.

Tuir JSMP nia observasaun deskobre katak, deputadu balun sei nafatin preokupa no la aseita atu diskute lei rua ne'e, tanbá haree ba tempu ne'ebé limitadu, no kestaun orsamentu. Ho razaun no konsiderasaun hirak ne'e deputadu sira ne'ebé la konkorda propoin ba Prezidente Parlamentu Nasionál atu adia lei rua ne'e ba terseriu lejislatura.

Mesmu nune'é, Vice Prezidente Parlamentu Nasionál ne'ebé lidera sesaun plenária, husu ba deputadu sira atu nafatin kontinua halo diskusaun no aprova lei rua refere.

JSMP kompriende katak dala-ruma sei iha dezafiu substansiál oi-oin durante implementasaun lei rua ne'e, maibé importante atu hatuur dau-daun kuadru legál atu kumpri Estadu nia obrigasaun tuir lei internasionál haruka no asegura katak vítima sira asesu ba tratamentu ne'ebé justu. Tanbá ne'e JSMP enkoraza no ezije Parlamentu Nasionál atu kontinua sesaun plenáriu no aprovasaun ba lei rua ne'e.

JSMP konvensidu katak se Parlamentu Nasionál konsege maneija prioridade ba debate no aprova lei rua ne'e, sei produz vantajem polítika boot liu ba polítiku sira iha Parlamentu Nasionál. Aprovasaun lei rua ne'e mós sei sai hanesan agenda polítiku estratéjiku liu ba polítiku na'in sira durante kampañe ba elisaun Prezidensiál no Parlamentár nian.

Aleinde ne'e, aprovasaun lei rua ne'e sei marka sentidu istória lejislativu ne'ebé diferente durante períodu segundu lejislativu, tanbá Parlamentu Nasionál konfirma sira nia komitmentu institusionál hanesan representante povu nian atu dignifika vítima no sobrevivente sira nia kontribuisaun ba luta ba independénsia. Iha tempu hanesan atu konfirma komitmentu atu hakribi violasaun direitus umanus no kondena violasaun direituz umanus iha forma no situasaun saída deit. Liu tan, Programa Reparasaun Nasionál no estabesimentu Intitutu Memória Públiku, nu'udar meus no kondisaun ida atu garante estabilidade nasional ba tempu naruk liu-liu ba nasaun sira ne'ebé foin sai hosi konflitu naruk hanesan Timór Lésté.

Atu hetan informasaun kle'an favor kontaktu direktamente :

Luis de Oliveira Sampaio  
Diretór Ezekutivu JSMP  
Diresaun e-mail: [luis@jsmp.minihub.org](mailto:luis@jsmp.minihub.org)  
Landline: 3323883